

## Efesu Paulo Tyyriti, Efesu Hãwã-ò

<sup>1</sup> Paulo, Jesuisi Kristu deòdỹna jiarỹ rare. Deuxudeewimy tahe kia rare. Efesu hãwã ityhydỹdu mahãdu —ò kalemy warybe rewahinyreri. Kaiboho ywimynodu mahãdumy toimahãte. <sup>2</sup> Ruxetòena adeeremy kidiatykemy Deuxu-ribi idi watzireri tule Jesuisi Kristu Inynyrỹ-ribi.

<sup>3</sup> Deuxu, Inynyrỹ tybyreny, inyboho tuu reàlãmyhỹrenyre. Tii dori inydeereny wihikỹ inywo ywinamy diwahinyde Jesuisi òraru-ki biukihikỹle wahe. <sup>4</sup> Deuxu inyyreny-ribi rihitxinymy ritare. Inyboho heka tuu roire. Ihetxiu heka inyho aõkõu tii rihitxinymy ritakremy rỹimyhỹre, inyboho wahe. Kristu-ki iny rihitxinymy rỹire. Iny òbitimy rỹirakemy rihitxinyre, ywimy nodumy wahe. Kiamy heka rokoirekre Kristuko-txi luuna-di. <sup>5</sup> Ihetxiu tamywimy Deuxu rihitxinymy ritare, inyboho wahe. Iriòrereny wesemy rokoirekemy. <sup>6</sup> Kiamy heka Deuxu riwinyre àlãna, wohyna-wana tamy rikiwahinyrenykemy tii dori inyluurekí wahe. Kristu hãlubu òrarukile biu-ò henareny iny nade. Iny òrarureny riòwynyre taruxetòena wihikỹ òraru-ki. <sup>7-10</sup> Ruxetòena sòwemy inydeereny diwahinyde tii dori ibutumy aõna aõna erydu rare. Deuxu dee wina rybe wòte wese rare. Tahe inydeereny kiditynynykemy idi ratzireri. Tamywimy tahe inydeereny

riteòsinyre. Iwese tii rōhōtinyre wese. Bededỹnana rexihukreu. Kristu-ki ibutumy aōna aōna biu-ki bede-ki rỹikremy ihỹre. Kiamy tahe Deuxu rōhōtinyre. <sup>11-12</sup> Kristu òraru-ki Deuxu juhū iny mahāduy-ribi inyboho rihitxinyreny. Tii diwahinyde inydeereny uriōnojura jurana. Tii dori ixideewilemy ibutumy aōhebo rotỹnynmyhỹre Deuxu kia hitxidỹna mahādu ixidile wowydyna mahāduō rỹirakemy rỹimyhỹre. Inyboho juhū rityhynyreny Kristu-ò. <sup>13</sup> Kaiboho kiaō toimahāte. Juhū rybe inatyhy-ò taholatenyteu, tetyhynmyhỹtenyte tarasa Rybewihikỹ-ò wahe. Tai tahe Deuxu Tyytybytyhy-di ratidỹna wesemy iny dee ritidimyhỹre. Deuxu Tyytybytyhy dori tii kidiwahinykemy rarybere, ihetxiu wahe. <sup>14</sup> Uriōno jura jurana Deuxu Tyytybytyhy rare inydeereny. Deuxu tahōrō mahādu ritakreu, tuu reālārenykre tuu, inyboho dori kia mahāduō roire.

<sup>15</sup> Tahe jiarỹ, Paulo, tule umy raholamahāre Jesuisi Kristu atyhydỹna-ò, tule aluuna ityhydỹdu-ò. Tai tahe Deuxu-ò àlāna-di araxitōedỹnyrenymahāre. Wanohōti aribireny rosaōhyymyhỹre. <sup>16-17</sup> Deuxu tahe Jesuisi Kristu biu loosōna tyby rare. Tii araykyreny-ò bedeeryna kidiwahinykemy watzireri, awolyrana kidiwahinykemy watzireri. <sup>18</sup> Tai tahe araykyrawoni ritỹnynkemy watzireri. Tai kaiboho bierybenykre Deuxu iryra. Tule ityhyna biu loosōna-di bierybenyky watzireri. <sup>19</sup> Deuxu taruruna sōwemy diwahinymyhỹde ityhydỹdu mahādu-ò. Iruruna tahe aōni rare inydeereny uriōno jura jurana. Kia tule

bierybenykemy watzireri. <sup>20-21</sup> Kia irurumy inyboho tuu robirenyre, Kristu rubu-ribi rexiixixanyreu, taruruna weribi ronykemy disỹnydeu, biukihikỹle wahe. Kristu tahe ibutu ruruna wixira wixira ratyre rare, ibutu wedu ratyre, ibutu dinodu ratyre, ibutu deòdỹỹdu ratyre. Ibutuni ratyre tii rare. Wijinani ratyre, tule kanakremy ihỹreni ratyre rare. <sup>22</sup> Deuxu tahe ibutu aõna aõna wixira wixira Kristuwarawo-ò ritidire tai tii ibutuwedukremy. Tii ibukurati wesemy rare. Kia tii ihỹre dohodỹỹdu mahãdu-ò, iwedu wahe. <sup>23</sup> Dohodỹỹdu mahãdu tahe Kristumy wese rare. Kristu dori ibutu aõna aõna ritỹxinymyhỹre.

## 2

<sup>1</sup> Juhuu kaiboho rubumy tãimahãte òraruna òraru-ki. <sup>2</sup> Juhuu kaiboho bedeaõmydỹỹnana bede-ki toitemahã juhUU Satanasi deòdỹỹna tetyhynumy toitemahã. Tii bedeyhy ruruna dinodu rare. Ityhydỹỹdukõdu mahãdu wiji dori rityhynumy rỹira, itxiõdỹỹdu mahãdu wahe. <sup>3</sup> Ityhydỹỹdukõdu mahãduy-ki juhUU tule inyboho roiremahã —ibutumy ixideerenywimy inyboho riwinyreny; inyraykyreny wydyna-deewimy tule inyboho riwinyreny. Eehewidỹỹdu inyboho roiremyhỹ, tuu ratybienumy rarehyy dori tuu rare. Iwese ijõ roiremyhỹ wese. <sup>4</sup> Deuxu tahe sõwetyhymy ruxetõena diwahinymyhỹde, inyluurenkyreki. <sup>5-6</sup> Deuxu inyboho rurudỹỹnyre Kristu-wana rubu-ribi riixixanyreny. Kristusỹ-ki biu-ki tii inyboho risỹnyre tai rokonyrenykemy. Iruxetõena

òrarukile abiu-ò henareny dire. <sup>7</sup> Iruxetòena kiditeòsinykre bededỹnana robehemy roireki wahe. Iwese sòwehyymy iruxetòena diwahinyde wesemy. <sup>8</sup> Tarasana Deuxu ruxetòenaribile nade aityhydỹnareny òraru-ki tuu rare. Iny-ribi aõkõ nade. Deuxu wahidỹna rare. <sup>9</sup> Iny-ribi rarybekre inyõ ixityhydỹmy tahe aõkõre Deuxu ruxetòenakile tuu rare. <sup>10</sup> Tii tahe ibutumy iny riwinyrenyre. Òbiti aõmydỹnana widỹdukemy iny riwinyre Jesuisi Kristu òraru-ki. Deuxule juhoo rõhõtinyre òbiti widỹdumy aõbo rokoirekemy.

<sup>11</sup> Tahe kaiboho uritere nohõti losaõmy kaiboho judeukõdu mahãdu toite juhoo mahã. Kiamy judeu mahãdu arãnimyhỹrenyre, notykyresykõdu mahãdu wahe. Tii dori notyky resydu mahãdu roire, iyresynadireki wahe. <sup>12</sup> Juhoo tahe aruta wesele toite Kristu-ki aõkõ. Judeu mahãdu-ribi rihitxiny my nyimyhỹde. Deuxu rybe ywisidỹna ludu aõkõ toite. Araròsòna renyõhyyre. Adeux-urenyõhyyre bede bedemy. <sup>13</sup> Juhu irehemy Deuxu-ribi toite mahã. Tahe wiji Jesuisi Kristu hãlubu òraru-ki araòhòdỹniny toite. <sup>14</sup> Jesuisi Kristu tahe iny ywidỹna rare. Kyarana tahe òtity wese itya-ki rỹimyhỹre judeu mahãdu aribi kia rihitxinyre. Tahe kia òtity ritxiwire tahe sohoji mahãdulemy riwinyre. <sup>15</sup> Tahe Kristu rurureu tahe ixãwire kia bede ywina. Tahe inatxi wimy òludu mahãdu sohoji iny tỹmyrahyyemy riwinyre. Tahe ywina rõhònyre wiwana ributunyra tahe Deuxu taluuna tamy riwahinyra. <sup>16</sup> Jesuisi taitxe-ki rurureki, ywina rieryrenyre.

Tahe kyarana-ribi riixãwididỹnyre. <sup>17</sup> Jesuisi tahe ywinamy rarybere iòhò ludu kaiboho wahe tule irehe ludu, judeukõdu mahãdu wahe. <sup>18</sup> Tahe kaiboho jiarỹboho-wana sohoji Deuxu Tyytybytyhy òrarukile Deuxu-ò rekexitòenyrenyke. <sup>19</sup> Kawese tahe kaiboho ityhydỹdu mahãdu-ò talote. Iny-ribi lahitxi aõkõ toite, Deuxusỹ mahãduõle heka toite. <sup>20</sup> Deuxu rybedu, tadeòdu-wana hetoõ wesemy kaiboho boibekre. Jesuisi Kristule iko ludu mana wese rare. <sup>21</sup> Jesuisi Kristu òraru-ki wiwesehyyle heto awiny rỹire. Tai Inynrỹ hetotyhy relemy rexihumyhỹre. <sup>22</sup> Kaiboho tule matybiyenbenykre Deuxu Tyytybytyhy hetoõ wese wahe.

### 3

<sup>1</sup> Tai jiarỹ, Paulo, rotenaki nodu wesemy rare Jesuisi Kristu òraru-ki. Judeukõdu mahãdu dee kiamy heka watxiwãhãre, adeereny wahe. <sup>2</sup> Deuxu ruxetòena wadee riwahinyre. Kaiboho aõbo tuu taholatenyõmahãte. <sup>3</sup> Deuxu dori tawòtena diteòsinyde wadee. <sup>4-5</sup> Jiarỹ kiamy juhoo reritinyriòrere katyyritikile wahe. Idi mariabenykeu bierybenykemy idi watxireri, timybo Kristu wòtena rybe reeryremy wahe. Kristu wòtena tahe ihetxiu ibutu inyõ riteòsinyõhyre. Wiji tahe riteòsinymy ihỹre Deuxu Tyytybytyhyle tahe deòdu-ò, rybedu-ò ritỹnynymy ihỹre. <sup>6-7</sup> Kiamy heka rare: kaiboho, judeukõdu mahãdu, wii ributunyre inyboho-wana judeu mahãdu wahe. Uriõnowi jurawi juramy idi rokoirekre, sohoji mahãdulemy wahe. Kristu Rybewihikỹ òraru-ki ityhydỹdu mahãdu-ò rirònyrenyre. Kia rybe-di rybedumy diwateònyde,

ruxetòena wahidỹỹnaõ wadee nade Deuxu ruruna sõwe-ribi. Ityhydỹỹdu mahãduy-ribi jiarỹ aõ aõkõmy watxiwãhãre retyhynytyhymy aõkõ watxiwãhãre. <sup>8</sup> Ihãrele Rybewihikỹ rybedumy ararekre Kristu aõmydỹỹnana heka iny raykywydyna ratyre awimy ihỹre. Kiamy judeukõdu mahãdu-ò arelyykemy riwahitxinyre. <sup>9</sup> Ibutu inyõ rybe wòtena aritỹnynykemy watxiwãhãre juhuu Deuxu Jesuisi-wana ibutumy aõna aõna riwinyre kiau rybewòtena riwòmý roimyhỹre Deuxu-ki. <sup>10</sup> Wijina tahe riteòsinykemy ihỹre dohodỹỹna-ki. Tai tahe ibutumy biu-ribi rurunadu, bedeerydỹỹdu rierykemy timykibo Deuxu bede erysyna-di raremyhỹ ibutumy aõna aõna erysyna-di. <sup>11</sup> Iwese Deuxu ibutumy aõhebo rotỹỹnykemy ratximyhỹre wese iny rierykre, Inynyrỹ Jesuisi Kristu òrarukile wahe. <sup>12</sup> Tai tahe iny rexideòsinymyhỹre brebuõlemy Deuxu ixitòenadỹỹna-di Kristu dori inyboho rityhynymyhỹre. <sup>13</sup> Tai kaiboho ixiiiodỹỹrenyõmy ahãke, jiarỹ aõhõkỹmy ratỹỹnyreki kia dori awowydyna rare, waaõhõkỹmy dỹỹnana wahe.

<sup>14</sup> Tai tahe umyreny Deuxu-ò rexitòenyre Inynyrỹ Jesuisi Kristu tyhy-ò wahe. Ibutu sỹ mahãdu tyby Deuxu rare. <sup>15</sup> Ruruna adeereny kidiwahinykemy idi watxireri, tawowydyna sõwe-ribi wahe. <sup>16</sup> Deuxu Tyytybytyhy rurutyhy araykywo-ò kidiwahinykemy watxireri. <sup>17</sup> Tai Kristu aworeny-ki kanasỹnymyhỹkemy rahõtinyinmahãre atyhyna direki kaiboho heka wiluutyhymy boibekemy watxireri. <sup>18</sup> Tai ibutu ityhydỹỹdu mahãdu-wana Kristu luuna

bierybenyke. Inyõ Kristu luuna awire rieryõtyhy. Ihãrele tahe bierybenyke iwese rare wesemy. <sup>19</sup> Tai Deuxu-di bexilỹxinykemy idi watrixeri.

<sup>20</sup> Deuxu iruruna dire. Tai iny ixitòena ratyre inydeereny kidiwahinykemy idi ihỹre. Iny irurudireki wahe. <sup>21</sup> Dohodỹỹdu mahãdu wowydyna riwahinykemy tamy watrixeri, aõu aõu wahe. Bededỹỹnana konana-ò wahe. Kie.

## 4

<sup>1</sup> Inynyrỹ deòdu arixidu jiarỹ rare. Arexitòenykre inihe adeereny. Yrubuna-di aõhebo botỹỹnybenykemy adireny watrixeri. Tai tahe Deuxudeewimy boibekre. <sup>2-3</sup> Tii dori juhoo adeereny irydu rare òbitimy boibekemy xiwedeõmy boibeke, ele eleõmy; wii biwiòhenanymy; luuna-di marurunymy boibeke. Ixi wesehyylemy boibekemy. Tai tahe Deuxu Tyytybytyhy aratorabutenyrenykre ywimy nodu dori kia diwiòhenanymyhỹde. <sup>4</sup> Sohoji mahãdule rare, sohoji Deuxu Tyytybytyhydile. Umy sohoji wese, ityytyby sohojilemy wese rare. Kaiboho tule araròsònareny sohojile rare, kaiboho ityhydỹỹdumy terònyteki wahe. <sup>5</sup> Inynyrỹ sohojile rare inytyhynareny sohojile rare. Tule iny ratisebena sohojile rare. <sup>6</sup> Deuxu tule sohojilere, ibutu tybymy rare ibutu ratyre rare. Ibutuy-ki tii rare. Tule ibutu rawo-ki ratrixeri. Ibutumy aõhebo rotỹỹnykemy iny-di riwisỹnyreri tawowina-di. <sup>7</sup> Kristu tahe iny sõwemy rareki sohoji ruxetòena sõwemy sohoji-ò riwahinyre. <sup>8</sup> Kiamy heka ritina-ki roire: —Iu Jesuisi raòwònyreu biu-ò ròtena ludu mahãdu

ridyre idi wahidỹỹna inydeereny diwahinyde. <sup>9</sup> Betehebentyke rybeweereõ-ò raòwònyremy. Aõmybohe kia rarybereri. Tahe juhuu dori surawo-txi robehere kiakékile tahe idi raòwònyke. <sup>10</sup> Kia robeherele taheka raòwònyre biuratyremy ibutu aõna aõna-di rexilỹxinykemy. <sup>11</sup> Inyõ-ò deòdỹỹna mahådumy rarekemy diwahinyde aõwihikỹ widỹỹ wahidỹỹna wahe. Ijõ-ò Deuxu rybedumy mahãdu rarekemy diwahinyde. Ijõ-ò Rybewihikỹmy rybedu mahådumy rarekemy diwahinyde. Ijõ ityhydỹỹdu mahãdu yrubudỹỹdu mahådumy rarekemy. Ijõ bedeerydỹỹdumy mahãdu rarekemy. <sup>12</sup> Ibutumy kia mahãdu ityhydỹỹdu riwiòhenanykemy idi ratxireri. Tai ityhydỹỹdu iaõmysỹdỹỹna riwinykre. Kristu umy wesemy ritibiedỹỹnykemy. Ibutu dee diwahinyde. <sup>13</sup> Ikonanau tahe ibutumy wiwese wesemy rõkõhõtinyrenyke, iny tyhynareny wahe. Deuxu Riòre rikierityhyrenykeny, iny òbitimy rokoireke, Kristu òbiti wesemy rokoireke. <sup>14</sup> Tohouã wesemy aõkõ rokoireke inytyhynareny-ki. Uritere wixiradỹỹrenyõmy ibutu bedeeryna wixira wixira-di. Iwese yhy tiò tiò aõ riwymyhỹre wese kia bedeerydỹỹdu rare. Iwixira tyhydỹỹna-ò kia ityhydỹỹdu mahãdu ridykemy ratximyhỹre. Ijõ inatyhy rybe weselemy rarybere. Tahe aõkõre. Kia-ò ijohonarenyõmy. <sup>15</sup> Tahe luuna-di inatyhymy marybebentyke. Kristu aõmydỹỹnana-di bexilỹxinybenykeny idi maumynybenyke. Tii dori iny wedureny rare. <sup>16</sup> Ityhydỹỹdu mahãdu heka Kristu umy wese rare. Ityhydỹỹdu sohoji sohoji wijura jura weselemy



rỹira. Kristu ibutumy riwiòhenanymyhỹre iwese umy hona umy wese. Umyjura kia ibutumy iaõmysỹdỹỹ dire. Wiweselemy tahe raaõmysỹdỹỹnykeki tai tahe umy awimy rariamyhỹke. Ijõ widerakeki tahe, Kristu umy raumynyõtyhy.

<sup>17</sup> Katahe Inynyrỹnimy adeereny kiamy rarybemyhỹre. Ityhydỹỹdukõdu mahãdu wesemy aõkõ boibenybeke. <sup>18</sup> Iraykyreny bedeluru-ki ihỹrenyre. Ieheherenyre, rieryõrenyre. Tai tahe Deuxu biu-ò hena umytuedeõna rieryõrenyre. <sup>19</sup> Ixãruna ihoõhyre. Urile ibutumy òraruna-txi rexiwahinyrenyre. <sup>20</sup> Kia Jesusimy aõkõ teerytenyte inyribireny wahe. <sup>21-22</sup> Jesuisi inatyhyna teerytenyteki, ibutumy aõbina bina ixi-ribi bihitxinyke. <sup>23</sup> Ibutumy awo arayky-wana bexitỹmyranyke. <sup>24</sup> Deuxu umy tỹmyra wesena-di bexityhynybenyke. Kia heka òbiti rare; inatyhy rare.

<sup>25</sup> Tai tahe ruirenyõmy wahe. Inatyhymy iny wixira-ò marybemahãbeny. Wiwese hyylemy widi rakatximyhỹrenyke. <sup>26</sup> Makyarananymahã-wana tahe urile òraru-txi ixẽõmy. Ixi-di txu iròtedỹỹõmy awobinana-di <sup>27</sup> Tule Satanasi deradỹỹna-ò nokõmy. <sup>28</sup> Inyõ juhUU wasidureki, ixityre tii wasiõmy. Tii wiji raaõmysỹdỹỹkre aõna aõna wiwihikỹ tebò-di riwinykemy wahe. Tai tahe iaõdikre iny aõkõmy rỹira riwiòhenanyke. <sup>29</sup> Kai uritere rybebinaõ ary-ribi iòlòdỹỹõmy Rybewiwihikỹlemy marybemahã. Kia rybe-di ijohodu riwiòhenanymyhỹrele kynyhetuukre. <sup>30</sup> Bibedeòtiidỹỹõmy Deuxu Tyytybytyhy. Tii

dori arayrubunymyhÿre tarasanatxu-ò. <sup>31</sup> Òbina rybemy widi nokõmy, wimy ujõmoõmy, adebure ijà ijàõmy, aõbinamy inymy ijyyõmy, rybebina-di iny ihetedÿÿõmy. <sup>32</sup> Tahe ibutu dee ywimy boibekre, awimy wahe ainytyhymy iny-di boibekre. Aõbinamy iny adee rarybe-wana tahe iribi bexinohõtilosanymy biixãwididÿÿnymy Deuxu dori inyòraru riixãwididÿÿnyreki wahe.

## 5

<sup>1</sup> Deuxu inytybytyhyreny rare. Tai tahe iwese uladu tyby wesemy rotÿÿnymyhÿre wese, kaiboho Deuxu wesemy matximahãbenyke Deuxu riòre lunadu wesemy matximahãbenyke. Wiluurenyke, Kristu dori aluurenyre. <sup>2</sup> Tule rexiwahinyre xiwe wesemy iny ritarenykemy. Tai tahe Deuxu dee kia lÿnyrena wiwihikÿ wese rare.

<sup>3</sup> Tahe òta òtarenyõmy. Ibutumy aõna aõna bina bina widÿÿrenyõmy. Kaiboho dori ityhydÿÿdu mahãdu toite. <sup>4</sup> Rybebinamy uriteretere rybeõmy. Ixideòsidÿÿõmy. Kia widÿÿna tahe ibinare. Tahe aõwihikÿõ biwinyke, Deuxu deàlànamy. <sup>5</sup> Òta òtadu tahe Deuxu òlõna wahidÿÿna ritaõtyhy, iny binaõ aõkõ, inywobire aõkõ. Kia Deuxu tyhy biukõdu mahãdu rare. Bierybenyke kia. <sup>6</sup> Itxenadÿÿ rybe-ò ijohonarenyõmy. Ityhydÿÿdukõdu mahãdu Deuxu rybe riywinyõmyhÿre. Tai tahe Deuxu reburemyhÿre tamyreny. <sup>7</sup> Tiiboho-wana ratxiõhyymyhÿrenyre iaõmydÿÿnana binareki. <sup>8</sup> Hÿÿnau kaiboho bedeluru-ki toitemahã. Tahe wiji Inynyrÿ loosòna-ki toite. Loosònadÿÿdu riòre weselemy boibeke. <sup>9</sup> Aõbo loosòna-ribi nade tahe

awire, òbitire, inatyhyre. <sup>10</sup> Tai aõbo Inynyrỹdeewi kia riteòsinyre. <sup>11-12</sup> Iwese bedelurubina widỹỹdu aõhebo rotỹỹnyre wese uritere iwidỹỹrenyõmy tahe teòsaremy tamy marybebenyke. Aõbo tiiboho wasimy aõhebo rotỹỹnymyhỹre ixỹruna adee rare tuu maryhemahãkeki. <sup>13</sup> Ibutumy aõna aõna loosòna ritỹnynyre. Tai tahe iny aõmydỹỹnana loosòna ritỹnynykeki, iny rierykre itỹnydỹỹna dori loosòna rare. <sup>14</sup> Tyyritiõ kia wesemy rỹire: —Inyõ rõrõmy rỹikeki, rexixake rubuy-ribi rỹike. Kristu tahe araloosònanykre.

<sup>15</sup> Aõhebo botỹỹnybenykeò bexiijebenyke. Itxỹte widỹỹdu mahãdu wesemy aõkõ ahabenyke, bedeerydu mahãdu wesemy ahãbenyke. <sup>16</sup> Iõnodỹỹõmy abededỹỹnana. Wiji txu bededỹỹnana tahe ibinatyhymy rare. <sup>17</sup> Tai tahe itxỹteõmy ahãke. Bierybenyke aõbo Deuxu dee wire. <sup>18</sup> Vĩĩ mona-di axaxa rubudỹỹna wesemy aõkõ matxibenyke. Kia tahe aõnityhyre, tumodu wahe. Tahe Deuxu Tyytybytyhy heka atykymy ralòmy boibeke. <sup>19</sup> Mawinymy bexirybenyke awo-ki. Bexirybenybenyke Inynyrỹ-ò awi-ribi bitxienymy mawiunykere. Rybewiumy marybeke. <sup>20</sup> Deuxu inytybyreny-ò ibutumy bealãmahãbenyke Jesuisi Kristu Inynyrỹni òraru-ki tahe bexitòenyke. <sup>21</sup> Kaiboho ibutumy widee bexiywinyhyymy ahãbenykre.

<sup>22-24</sup> Iwese dohodỹỹna mahãdu Kristu rybe rityhynymyhỹre wese, hãwyy tahãbu rybe riywinyke, ibutu aõmydỹỹnana-ki wahe. Hãbu dori tahãwyy dinodu wese rare. <sup>25</sup> Ibutumy hãbu tahãwyy luukemy. Kristu dori dohodỹỹna mahãdu

luureki ture. Tamy tii rexiwahinyre rurukemy. <sup>26</sup> Tai tahe kia òbitidỹĩnami rurure. Iwese bee aõ rasuhòmyhỹre wese, tarybe risuhòmyhỹre. <sup>27</sup> Iòraru-ki tahe Jesuisi dohodỹĩna mahādu wiwihikỹõ ixidee rimykre. Òbiti mahādulemy rarekre, aõbina binaõ heka tai rỹiõhyymyhỹre. Awi mahādu widỹĩdumy rarekre. <sup>28</sup> Kiamy heka hābu tahāwyy-di rỹirake. Iwese hābu taumy luure wese tahāwyy luumy rỹirake. Iny tahāwyy luukeki, kia-di ixiluuke. <sup>29</sup> Iny taumyderamy rỹiõhyymyhỹre. Tahe aõkõre tule rexiòwenymyhỹre rexiwesenanymyhỹre. Iwese Kristu dohodỹĩna mahādu riwisinanymyhỹre wese. <sup>30</sup> Inyboho dori Kristu mahāduõ roire. <sup>31</sup> Kiamy heka Ritina roire: —Tai heka hābuõ tybyboho heto ririmyhỹre tahāwyy-wana wii ributunymy roirekemy. Inatxi umy ribi sohoji umyhyymy ròhònymyhỹre. <sup>32</sup> Kia aõmydỹĩnana heka ierysysirare. Tahe Kristu tohodỹĩna mahādu-wana rarybereri. <sup>33</sup> Ihārele tahe hābu tahāwyy luumy rỹira iwese ixiluumy rỹira wese. Tule hāwyy tahābu rityhynyke.

## 6

<sup>1</sup> Uladu mahādu tybyboho rybe rityhynymyhỹre Inynyrỹ òraru-ki. Kia tahe òbiti rare. <sup>2</sup> Boo adi-wana bityhynybenyke. Kia tahe bede ywina rybe juhū rare. Tule Deuxu raròsòna kia bede ywina rybe-wana rare. <sup>3</sup> Kia biywinybenykeki, awimy mabeke, abededỹĩnana irehemy mabeke kabede-ki. <sup>4</sup> Uladu tyby, uladuse, ariòrereny adeburehyymy idi iwisỹdỹĩrenyõmy. Tahe aõki

reòsakeki tii riòbitinykemy tamy marybebenyke. Inynyrỹ deòsidỹna-di tamy marybebenyke.

<sup>5</sup> Deòdu mahādu kabede-ki awedureny bityhynybenyke. Awo-ribi tyhy tamywimy biwinybenyke. Bexijemy ywimy biwinymy. Iwese Kristu dee tewinymahāte wesemy. <sup>6</sup> Aõ tabiteriki aõkõ biywinyke. Iwese Kristu deòdu wesemy mabeke. Deuxu dee wina awo-ribi biwinyke. <sup>7</sup> Deysana-di ibutumy òbitimy bisỹdỹnyke. <sup>8</sup> Ibutumy deòdu ada deòdukõdu Inynyrỹ-ribi aõna aõna rimyke. Tamy aõwiihikỹ riwinykeki. <sup>9</sup> Tahe wedu mahādu, kaiboho eòdu mahādu-ò kia weselemy mabeke. Brebudỹrybe-di eòdureny-ò rybeõmy. Awedu dori eòdureny wedu tule biu-ki ratximyhỹre. Tamy dori ibutumy wiwese wesele rare.

<sup>10</sup> Ibutu-ò tahe ikonanamy ararybekre. Inynyrỹ ruruna-di bexirurudỹnyke. Iruru tahe aõni rare. Tahe ixidee bimyyke. <sup>11</sup> Bexityynyke aõbinanatyy-di, debõna aõmydỹnana bimyyke. Tai tahe Diabo rybemy nodu biòludunyke. <sup>12</sup> Iny ijusunareny dori moo iny-wana aõkõ rare. Iwitxira Satanasi ruruna-di rare. Dinodu ruru-di rare, kabede luruhukỹ wedu-di wahe. Tytybybina ruru-di rare, biukihikỹle. <sup>13</sup> Tai tahe ibutumy Deuxu debõna aõna aõna bimyyke. Idi txubina-ki biòlòdỹnyke. Aijesu bitakeu tahe, òraru rỹike. <sup>14</sup> Inatyhyna-di awereysana birarutxynyke. Òbitina-di abreti bitòbònyke. <sup>15</sup> Bexiywinyke ywina Rybewihikỹ rybena-ò. Tii heka adikre. <sup>16</sup> Ityhyna tahe awyhyitxenamy ihỹre, idi eorutà bitỹtenyke. Idi tahe Satanasi heòty wyhy biturinyke. <sup>17</sup> Tarasana tahe arataana

wese rare. Deuxu Tyytybytyhy mayrehe heka Deuxu rybe rare. <sup>18</sup> Deuxu Tyytybytyhy-ki ibutumy ixitòedỹhyymy atximahābenyke. Kia-di tahe biriranymy, boibeke. Ityhydỹỹdu mahādu ibutumy bexitòenyhyymy boibeke. <sup>19</sup> Tule wadee, bexitòenybenyke. Deuxu wadee rybe kidiwahinykemy wahe. Tai brebukōlemy Rybewihikỹ aritỹnynykre, ierysy siramy wahe. <sup>20</sup> Jiarỹ Rybewihikỹ deòsidỹỹdu rare wawomati rerotidire hārele wahe. Kristumy arelyykemy watzireri. Tii heka wawidỹỹnare.

<sup>21-22</sup> Txitxiò tahe ityhydỹỹdu seriòreõ rare, waluunaduõ rare. Inynyrỹ rybe-di òbiti aõmysỹdỹỹdu rare. Tai tahe tii adeereny reteònyre waaõmydỹỹnana adee ritỹnynykeny. Awo riteysadỹỹnykremy.

<sup>23</sup> Ywina ibutumy ityhydỹỹdu mahādu seriòreõ kanakemy watzireri. Luuna tyhyna-wana kanakemy Deuxu, inytyby-ribi, Jesuisi Kristu, Inynyrỹ-ribi wahe. <sup>24</sup> Ruxetòena kanakemy watzireri Jesuisi inatyhymy luunadu mahādu-ò wahe. Tii Kristu rare, Inynyrỹreny wahe.

## **Deuxu Rybe Tyyriti** **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Karajá

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---

PDF generated using Haiola and XeLaTeX on 11 Nov 2022 from source files  
dated 29 Jan 2022

55ce0bcd-101e-52a3-984e-847027efe150